

益

齋

集

附拾遺
墓誌

一



益 齋 集

附拾遺 墓誌

(一)

李齊賢撰

益齋先生亂藁序

元有天下。四海旣一。三光五嶽之氣。渾淪磅礴。動盪發越。無中華邊遠之異。故有命世之才。雜出乎其間。沈浸醲郁。攬結粹精。敷爲文章。以資飾一代之理。可謂盛矣。高麗益齋先生。生是時。年未冠。文已有名當世。大爲忠宣王器重。從居輦轂下。朝之大儒搢紳先生。若牧菴姚公。閤公子靜。趙公子昂。元公復初。張公養浩。咸游王門。先生皆得與之交際。視易聽新。摩厲變化。固已極其正大高明之學。而又奉使川蜀。從王吳會。往返萬餘重。山河之壯。風俗之異。古聖賢之遺迹。凡所謂閱博絕特之觀。旣已包括而無餘。則其疎蕩奇氣。殆不在子長下矣。使先生登名王官。掌帝制。優游臺閣。則功業成就。決不讓向之數君子者。斂而東歸。相五朝。四爲冢宰。東民則幸矣。其如斯文何。雖然。東人仰之如泰山。學文之士。去其靡陋而稍爾雅。皆先生化之也。古之人。雖不登名王官。而化各行於其國。餘風振於後世。如叔向。子產。何可小哉。佐天子號令天下。人孰不慕之。而名之傳否。有不在彼而在此。尙何恨哉。先生著述甚多。嘗曰。先東菴尙未有文集行於世。況小子乎。故於詩文。旋作旋棄。而人輒藏之。季子六府少卿彰路。長孫內書舍人寶林。相與哀集爲若干卷。謀所以壽之梓。命余序。余曰。先生所撰國史。尙不免散逸於兵。矧片言隻字。爲人笥篋者。煨燼何疑。則若干卷。不可不亟刊行也。二君其勉之。嗚呼。余豈知言者哉。仍父子爲門生。不敢讓。姑志所見云。至正二十三年正月初吉。前應奉翰林文字承事郎。同知制誥。兼國史院編修官。正順大夫。密直司右

益齋集序

代言、進賢館提學、知製教、充春秋館修撰官、知軍簿司事、韓山李穡序。

益齋亂藁卷第一

高麗 李齊賢 仲思撰

鳳州龍湫

山前翠石雙扉啓。石底澄潭萬丈深。明浸日光紛閃閃。冷涵林影淨沈沈。斯民政要滋湯旱。彼相誰堪作說霖。出沒魚兒休察見。龍應先遣試人心。

楊花

似花非雪最顛狂。空闊風微轉渺茫。晴日欲迷深院落。春波不動小池塘。飄來鉛砌輕無影。吹入紗窗細有香。卻憶東臯讀書處。半隨紅雨撲空牀。

楊安普國公晏太尉藩王于玉淵堂

湖上華堂愜素聞。國公開讌樂吾君。十千美酒鸕鷀杓。二八佳人翡翠裙。茵菖香中聽過雨。菰蒲影際見行雲。笙歌未歇輪蹄鬧。漠漠西山日欲曛。

七夕

脈脈相望邂逅難。天教此夕一團圓。鵲橋已恨秋波遠。鴛枕那堪夜漏殘。人世可能無聚散。神僊也自有悲歡。猶勝羿婦偷靈藥。萬古羈棲守廣寒。

定興路上將之成都

雨餘泥滑路逶迤。兀兀征鞍撼四支。安坐豈償男子志。遠遊還愧老親思。野桑翳翳風來少。村樹茫茫日下遲。早晚歸來報明主。卻尋鷄黍故人期。

過中山府感倉唐事

倉唐爲誰者。魏國一陪臣。敦詩又說禮。幽語皆中倫。一言悟人主。遠子復相親。古今竹帛上。誰其君與鄰。至誠說狄相。純孝稱封人。願令四海民。共祠此三仁。一見一感發。天理不胥淪。

井陘

岡巒迴合井陘口。驅馬崎嶇登翠阜。英雄事去幾千載。尙有威名凜如在。卻憶淮陰布衣時。風雲壯志無人知。一朝登壇輔真主。下視噲等如嬰兒。火旗焰焰驚趙壁。鯨鯢血污蓮花鏢。燕齋草木靡餘風。劉項乾坤傾一諾。千金不購廣武君。萬全奇策誰當陳。乃知百戰戰必勝。不在多多益辦。只在屈己能從人。

過祁縣感祁奚事

吾愛晉朝祁大夫。爲君能舉午與□。乾坤自有公道在。肯以恩怨爲賢愚。不教遺直困陸沈。拂袖一去雲無心。當時囁咭來相謝。叔后豈是真知音。嗟哉此道日已微。對面九疑多是非。臨歧弔古一長嘆。吾非斯人誰與歸。

汾河

魚龍平生謾有凌雲志。未見仙人冰雪容。

豫讓橋

一片荒橋石。誰留國士名。山含千載憤。日照九泉誠。不爲恩難報。徒求事易成。此言真有激。邪佞合心驚。

黃河

黃河西流自崑崙。漢使乘槎背窮源。崑崙山高幾千仞。天河倒瀉流渾渾。崩騰九曲轉坤軸。浩蕩萬里浮天垠。有如楚漢戰垓下。千兵萬馬驅平原。橫流往往不可止。泛溢四野愁黎元。擘開兩山俾東注。辛苦巨靈留掌痕。蹇予少年遊每上。豪氣欲跨莊生鯤。西江真堪一口吸。雲夢不足胷中吞。今日沙頭欲解纜。兀坐不覺驚心魂。腥風打頭浪如屋。長帆遠與山相掀。篙師絕叫汗流瀦。日暮未到南岸村。我不是焚舟孟明視。期爲秦民一雪無窮冤。又不是投璧晉公子。誓與舅氏不負平生言。鐵牛有知應解笑。胡爲涉險西南奔。

張希孟侍郎見示江湖長短句一篇以詩奉謝

天靳文章數百年。一時輸與濟南賢。縱橫寶氣豐城劍。要妙古音清廟絃。便覺有功名教事。誰言費力短長篇。張侍郎題朱晦菴祠堂云。公若有靈應笑我。徒費力短長篇。興來三復高聲讀。萬里江山只眼前。

張侍郎詩附

三韓文物盛當年。刮目青雲又此賢。壯志玉虹纏古劍。至誠石虎裂驚絃。一鞭嵐翠遊山騎。滿紙珠璣

詠月篇。此去浣花春政好。白鷗應爲子來前。

奉和元復初學士贈別

昔從傾蓋眼能青。載酒同遊遍洛城。直欲執鞭如魯叟。豈惟結襪比王生。感公燈火三更話。慰我關山萬里行。更得新詩入囊褚。劍南人識汝南評。

元學士詩附

峨嵋山色夢中青。人自雞林使錦城。九域圖經歸一姓。四川風物契三生。捫參歷井眞虛語。詠月吟風足此行。細問孔明當日事。遼東卻對幼安評。

蜀道

此山從古有此道。幾時開。不借夸鳩手。誰分混沌胚。天形旂尾擲。岡勢劍鋒摧。霧送千林雨。江奔萬里雷。班班穿蒼鬱。蟲蟲上崔嵬。下馬行難竝。逢人走卻迴。驚猿空躑躅。去鳥但徘徊。才喜晨光啓。俄愁暮色催。金牛疑妄矣。流馬笑艱哉。寄謝題橋客。何須約重來。

八月十七日放舟向峨眉山

錦江江上白雲秋。唱徹驪駒下酒樓。一片紅旂風閃閃。數聲柔櫓水悠悠。雨催寒噴歸漁店。波送輕鷗近客舟。孰謂書生多不偶。每因王事飽清遊。

諸葛孔明祠堂

羣雄蜂起事紛拏。獨抱經綸臥草廬。許國義高三顧後。出師謀遠七擒餘。木牛流馬誰能了。羽扇綸巾我自知。千載忠誠懸日月。回頭魏晉但邱墟。

阻友符文鎮

峽雲蓬勃送秋霖。野店荒涼生暮陰。剛厭灘聲戰窗牖。更堪山瘴襲衣衾。百年身世千般計。萬里庭闈一片心。安得長風吹掃盡。仰看紅日上重岑。

登峨眉山

蒼雲浮地面。白日轉山腰。萬像歸無極。長空自寂寥。

雷洞平

胡孫梯高天尺五。石路蜿蜒細於縷。路傍大樹驚白晝。七十二神開洞府。奇巖壁立下無底。鴻洞雲嵐自吞吐。崖崩石出絕難度。惡木縱橫若相補。颯颯何處瀉奔流。俯聽遙空喧萬鼓。有時雨雹亂晴天。過客屏氣誰敢侮。腐儒一見動心魄。兩眼昏花汗如雨。也知平生足游觀。何事窮山愁仰俯。君不見天上金門似海深。仗衛森嚴羅九虎。狂夫雀躍蹈危機。達士龍潛臥環堵。

眉州

吾大人三昆季。俱以文筆顯於東方。伯父季父。相次仙去。唯公無恙。年今七十有奇。若使北來。得與中原賢士大夫進退詞林間。雖不敢自比於蘇家父子。亦可以名動一時。顧水陸千里。干戈十

年所處而安。無慕乎外。故天下莫有知之者。

眉山僻在天一方。滿城草木秋荒涼。過客停驂必相問。道傍爲有三蘇堂。三蘇鬱鬱應時出。一門秀氣森開張。渥洼獨步老騏驎。丹穴雙飛雛鳳凰。聯翩共入金門下。四海不敢言文章。邇來悠悠二百載。名與日月爭輝光。君不見雞林三李亦人傑。翰墨壇中皆授鉞。韓泊繩樞笑無用。王家珠樹譽成癖。機雲不入洛中來。皎皎滄洲委明月。兩雄已矣不須論。家有吾師今白髮。坡云。曷可忘。憂家有師。

思歸

扁舟漂泊若爲情。四海誰云盡弟兄。一聽征鴻思遠信。每看歸鳥嘆勞生。窮秋雨鏤青神樹。落日雲橫白帝城。認得蓴羹勝羊酪。行藏不用問君平。

上灘

乘流東去汭流還。客寢何時得小安。水落沙堆銖亦重。崖崩石出寸猶難。不妨聽雨留連睡。且喜逢山子細看。只媿郵人牽百丈。汗流終日走江干。

促織

促織復促織。哀鳴何惻惻。終夕弄機杼。平明無寸縷。娶婦才聞淚似泉。征夫一聽凋朱顏。春風融暖花著子。夏景舒長燕成壘。胡爲不自謀。直待霜清露冷方知秋。促織爾何愚。日月豈肯爲爾留須臾。

聽蹇道士彈秋風

我雖不能音好琴。莫如我。苟能得其趣。自謂不學可。我來蜀中何所聞。鼓笛紛紛耳欲破。聽之亂吾真。斥之恐遭罵。不謂古仙翁。玩世在城中。迎我在虛室。爲我鳴絲桐。一鼓塵懷清。再鼓古意生。玉篆烟消人悄悄。整襟更作秋風調。慘慄兮秋之爲氣也。霜露漸漸兮木葉下。望白雲兮征鴻哀。江水悠揚兮山崔嵬。嗟爾遠道之人兮。胡爲乎來哉。豈辭引滿玻璃鍾。此時此客心無窮。

路上自蜀歸燕

馬上行吟蜀道難。今朝始復入秦關。碧雲暮隔魚鳧水。紅樹秋連烏鼠山。文字剩添千古恨。利名誰博一身閒。令人最憶安和路。竹杖芒鞋自往還。

函谷關

形勝平看十二齊。下臨無路上無梯。土囊約住黃河北。地軸勾連白日西。天意已歸三尺劍。人心豈恃一丸泥。秋禾滿畝風塵靜。穩跨征鞍聽午雞。

澠池

強秦若翼虎。懦趙眞首鼠。特會非同盟。安危在此舉。藺卿膽如斗。杖劍立左右。叱咤生風雷。萬乘自繫缶。桓桓百萬兵。一言有重輕。廉頗伏高義。犬子慕遺名。駕言池上遊。去我今幾秋。餘威起毛髮。萬木寒飈颼。

二陵早發

予之將如成都也。內翰松雪趙公子昂以古調一篇相送。有勿云錦城樂早歸。乃良圖之句。十月

北歸雪後二陵道中忽憶其詩作此寄呈

夢破郵亭耿曉燈。欲乘鞍馬覺凌兢。雲迷柱史燒丹竈。雪壓文王避雨陵。觸事誰知胷磈磊。吟詩只得髮
鬢髥。塵巾折角裘穿縫。羞向龍門見李膺。

趙學士詩附

三韓望巴蜀。相去萬里餘。棧閣如登天。劍門不可踰。誰令觸炎熱。鞍馬事馳驅。王事有期程。吾敢永安
居。道路何緬邈。山川亦盤紆。賴彼多古蹟。庶可慰躊躇。勿云錦城樂。早歸乃良圖。秋高天氣清。矯首西
南隅。

渡孟津

旄鉞空煩叱逆流。山河曾未屬西周。陽侯不媿夷齊義。莫比黃龍負禹舟。

比干墓

墓在衛州北十許里。蓋周武王所封。而唐太宗貞觀中道過其地。自爲文以祭。其石刻剝落。亦可
識一二焉。夫二君之眷眷于異代之臣者。豈非哀其忠。愍其死乎。而武王忽伯夷於勝殷之後。太
宗疑魏徵於征遼之日者何耶。因作此詩。亦春秋責備賢者之義也。

周王封墓禮殷臣。爲惜忠言見殺身。何事華陽歸馬後。蒲輪不謝採薇人。
從來忿欲蔽良知。日暮令人有逆施。胥矣親祠比干墓。胡然卻仆魏徵碑。

燕都送朴忠佐少卿東歸

春風喜氣滿庭闌。稱意新官馬似飛。慚愧西山子規鳥。何人勤道不如歸。

和呈趙學士子昂

珥筆飄纓紫殿春。詩成奪得錦袍新。侍臣洗眼觀風采。曾是南朝第一人。
風流空想永和春。翰墨遺蹤百變新。千載幸逢真面目。況聞家有衛夫人。
學士夫人管氏亦工書。

松郡送朴少卿忠佐北上

玉管停三疊。金杯勸十分。但應期報主。不用惜離羣。草盡駝鳴磧。風高鴈叫雲。平生四方志。清夢又隨君。

登鵲嶺

烟生渴腦汗如流。十步真成八九休。莫怪後來當面過。徐行終亦到山頭。

送從兄君實典籤赴任三陟追錄

指李家中翰墨仙。湖山勝地佩章絃。登樓更長新詩價。清夢相尋謝惠連。

君實兄男達中魁登司馬試

顛倒銀袍再拜難。下堂攜手淚潺潺。咄嗟賀宴誰能辦。腸斷無人爲翦鬢。
舉進士者多儒家子弟。聞唱勝賀客。至無以待。必旋炊白飯。故俗呼爲熟飯。宴言其咄嗟。

飯。故俗呼爲熟飯。宴言其咄嗟。

九曜堂

溪水潺潺石逕斜。寂寥誰似道人家。庭前臥樹春無葉。盡日山蜂咽草花。夢破虛窗月半斜。隔林鍾鼓認僧家。無端五夜東風惡。南澗朝來幾片花。

和崔拙翁進退格

強顏徇俗非天稟。克己希賢乏近功。縱使不成優刻鵠。豈緣無用悔屠龍。中年漸覺人情隘。後世那知物論公。寄語平生三益友。他時刮目更相從。

舟中和一齋權宰相漢功將之江浙時

蘭舟曉發白雲樓。遙指江南第一州。滿酌金杯槌畫鼓。不攜西子亦風流。

金山寺

舊聞兜率莊嚴勝。今見蓬萊氣像閑。千步回廊延漲海。百層飛閣擁浮山。忘機鷺宿鐘聲裏。聽法龍蟠塔影閒。雄跨軒前漁唱晚。練波如掃月如灣。

焦山

裴老開浮玉。賀襟讓一焦。海吞吳地盡。山控楚天遙。蜃氣窗閒日。鷗聲砌下潮。欲歸還倚杖。松竹晚蕭蕭。

多景樓陪權一齋用古人韻同賦

楊子津南古潤州。幾番歡樂幾番愁。佞臣謀國魚貪餌。黠吏憂民鳥養羞。風鐸夜喧潮入浦。烟蓑暝立雨侵樓。中流擊楫非吾事。閒望天涯范蠡舟。

吳江又陪一齋用東坡韻作

十年俯首塵土窟。夢想滄州欲愁絕。吳江清勝天下稀。我初聞之趙松雪。滿船載酒攜佳人。巧笑清歌玉齒頰。垂虹橋下白鷗飛。白波接天天四垂。停盃更待江月上。信棹自喜風帆遲。卻憶岑參與杜甫。漢陂之樂真兒嬉。

姑蘇臺和權一齋用李太白韻

苧蘿佳人二八時。玉質不勞朱粉施。吳宮歡笑幾時畢。正是越王嘗膽日。姑蘇城頭秋草多。姑蘇城下江自波。鴟夷一舸今在何。

高亭山伯顏丞相駐軍之地

江上山如淡掃眉。人家處處槿花籬。停舟欲問松間寺。策杖先窺竹下池。帆影暮連芳草遠。鐘聲曉出白雲遲。憑欄一望三吳小。像想將軍立馬時。

宿臨安海會寺

梵宮臺殿遠嵯峨。沙步移舟夜始過。峽月轉廊隨響屐。溪風入戶動鳴珂。山因蘇子知名久。樹自錢王閱事多。陌上春歸花寂寂。唯聞谷鳥和村歌。陌上花曲
即此地事

冷泉亭

爲愛溪邊石。扶筇小立時。微波含落照。影動掛猿枝。

遊道場山陪一齋用東坡韻

煙收澄波動林麓。日上翠靄浮巖谷。長松苦竹十餘里。未到山中清興足。吳興田野海瀾漫。只有此山龍屈蟠。山中道場名伏虎。石欄桂柱臨風湍。道人閉戶不浪出。竹作匡牀蒲作席。壓簷老樹高十尋。云昔移來自封植。有懷謝公攜翠鬢。任性逍遙雲水閒。富貴他年卻不免。夢魂空想東西山。百歲真同昏與旦。更耐憂患常居半。世人豈比此道人。令我悠然一長嘆。

虎邱寺十月北上重遊

闔閭城外古禪林。生公堂前樹陰陰。重遊髣髴三生夢。四顧微茫萬里心。樓閣影重山月上。轆轤聲遠石泉深。藍輿歸去江村路。雲際猶聞鐘磬音。

多景樓雪後

樓高正喜雪漫空。晴後奇觀更不同。萬里天圍銀色界。六朝山擁水精宮。光搖醉眼滄溟日。清透詩腸草木風。卻笑區區何事業。十年揮汗九街中。

淮陰漂母墓

重士憐窮義自深。豈將一飯望千金。歸來卻責南昌長。未必王孫識母心。婦人猶解識英雄。一見殷勤慰困窮。自棄爪牙資敵國。項王無賴目重瞳。

西都留別邢通憲君紹

露侵征袖曉寒多。酒盡離觴塞月斜。誰料北窗螢雪客。每年鞍馬走風沙。

北上

斷鴈秋聲苦。荒雞夜色闌。呼燈憎僕懶。騎馬怕兒寒。時率兒子而行。草動霜飄袂。冰穿水迸鞍。主恩猶未報。努力敢求安。

去魯情何極。遊秦興未闌。每懷姜被暖。誰念范袍寒。對酒頻彈劍。吹燈乍枕鞍。白雲看漸遠。安得報平安。

寄遠

懽樂翻教恨懊新。功名只管別離頻。可憐畫閣樽前月。還照邊城馬上人。